

Сийрат дарслари (17-дарс)

СИЙРАТ
дарслари 17-дарс

Сийрат дарслари Шайх Мұхаммад Содиқ Мұхаммад Юсуф роҳимаҳуллоҳнинг
«Бу – Расулуллоҳ соллаллоҳу алайҳи васаллам» таржима китоблари ва
“Ҳадис ва ҳаёт”ning 19-жузъи асосида бериб борилади. Мавзуларнинг тўлиқ матни
 билан танишиш учун китобнинг ўзига мурожаат этиш тавсия этилади.

17:06 / 25.01.2019 4469

* * *

121. Абу Қатода розияллоҳу анҳудан ривоят қилинади:

«Расулуллоҳ соллаллоҳу алайҳи васаллам қизлари Зайнабни ва куёвлари Абу Оснинг қизи Умомани елкаларида кўтариб намоз ўқир эдилар. Қачон турсалар, уни кўтарар ва сажда қилсалар, қўяр эдилар».

Бухорий ва Муслим ривоят қилишган.

* * *

122. Умму Холид бинт Холид ибн Саъид ибн Ос розияллоҳу анҳодан ривоят қилинади:

«Расулуллоҳ соллаллоҳу алайҳи васалламнинг ҳузурларига отам билан бирга бордим. Устимда сариқ кўйлак бор эди. Расулуллоҳ соллаллоҳу алайҳи васаллам: «Санаҳ, санаҳ», дедилар.

Абдуллоҳ: «Бу ҳабашчасига «яхши» дегани», деди.

«Мен муҳри нубувватни ўйнай бошладим. Отам мени жеркиб ташлади. Расууллоҳ соллаллоҳу алайҳи васаллам: «**Уни тек қўй!**» дедилар. Сўнгра Расууллоҳ соллаллоҳу алайҳи васаллам: «**Кийиб чиритгин, кийиб эскитгин! Кийиб чиритгин, кийиб эскитгин! Кийиб чиритгин, кийиб эскитгин!**» дедилар».

Бухорий ривоят қилган.

* * *

123. *Оиша розияллоҳу анҳодан ривоят қилинади:*

«Мен Набий соллаллоҳу алайҳи васалламнинг ҳузурларида қўғирчоқ ўйнар эдим. Дугоналарим келишар ва Расууллоҳ соллаллоҳу алайҳи васалламдан тортиниб туришар эди. Расууллоҳ соллаллоҳу алайҳи васаллам уларни мен томон йўллаб қўяр эдилар. Сўнг улар мен билан ўйнашар эди».

Бухорий ва Муслим ривоят қилишган.

Бошқа ривоятда: «Расууллоҳ соллаллоҳу алайҳи васаллам Табук ёки Хайбар урушидан қайтиб келдилар. Уйнинг токчасида парда бор эди. Шамол турди ва парданинг бир тарафини кўтариб, Оишанинг ўйинчоқ қизларини очди. Шунда у зот: «**Бу нима, эй Оиша?**» дедилар. «Қизларим», дедим. Уларнинг орасида қуроқдан қилинган икки қанотли отни кўрдилар ва: «**Уларнинг орасида кўраётганим мана бу нарса нима?**» дедилар. «От», дедим. «**Унинг устидаги мана бу нарса нима?**» дедилар. «Иккита қанот», дедим. «**Отнинг иккита қаноти бўладими?**» дедилар. «Сулаймоннинг қанотли отлари бўлгани ҳақида эшитмаганмисиз?» дедим. Шунда у зот кулдилар ва мен ҳатто озиқ тишларини кўрдим», дейилган.

Абу Довуд ривоят қилган.

* * *

124. *Жобир ибн Самура розияллоҳу анҳу айтадилар:*

«Расууллоҳ соллаллоҳу алайҳи васаллам билан пешин намозини ўқидим. Сўнгра у зот ўз аҳллари олдига чиқдилар. Мен ҳам бирга чиқдим. У зотни болакайлар қаршилаб чиқишиди. Шунда у зот бирма-бир уларнинг юзларини силай бошладилар. Менинг ҳам юзимни силадилар. Қўлларида совуқликни ва атторнинг халтасидан чиқарган қўлида бўладиган хушбўйликни туйдим».

Муслим ривоят қилган.

* * *

125. *Саҳл ибн Саъд* розияллоҳу анҳудан ривоят қилинади:

«Мунзир ибн Абу Усайд туғилганида уни Набий соллаллоҳу алайҳи васалламнинг ҳузурларига олиб бориш-ди. Шунда у зот уни сонларига қўйдилар. Абу Усайд ўша ерда ўтирган эди, Набий соллаллоҳу алайҳи васаллам олдиларидағи бир нарса билан машғул бўлиб қолдилар. Абу Усайд буюрган эди, ўғлини Расууллоҳ соллаллоҳу алайҳи васалламнинг сонларидан олиб кетишиди. Расууллоҳ соллаллоҳу алайҳи васаллам машғулотдан фориғ бўлиб: «**Бола қани?**» дедилар. Абу Усайд: «Эй Аллоҳнинг Расули, уни қайтариб юбордик», деди. «**Исми нима?**» дедилар. «Фалончи», деди. «**Йўқ! Унинг исми Мунзир**», дедилар. Ўша куни уни Мунзир деб номлади».

Бухорий ва Муслим ривоят қилишган.

* * *

126. *Умар ибн Абу Салама* розияллоҳу анҳудан ривоят қилинади:

«Расууллоҳ соллаллоҳу алайҳи васалламнинг қарамоғларидағи бола эдим. Қўлим лаганда бориб-келар эди. Шунда у зот менга: «**Эй бола! Аллоҳнинг исми билан, ўнг қўлинг ила, ўзингга яқиндан егин!**» дедилар. Шундан сўнг менинг ейишим худди ўшандай бўлиб қолди».

Бухорий ва Муслим ривоят қилишган.

«Бу - Расулуллоҳ соллаллоҳу алайҳи васаллам» китобидан